

Il Fegl digl Anticrist

Sur Giosch Albrecht

GR 12-03-1968

Il roman da Ludovic Hendry. In roman da nos dis. E quei in roman ch'ei renda da leger. El fa patertgar. Per ordinari patertgein nus memia pauc. Il roman ha il sribent empermess a nus avon entgins meins. Jeu creiel denton ch'el hagi custau buca mo meins lavur, mobein forsa onns da meditaziun e ponderaziun.



Notg, perschun e sulegl che fiera umbrivas

Ual sun returnaus d'ina viseta pastorala ella perschun da Winterthur. Cun mei il patratg da scriver oz zatgei sur dil «Fegl digl Anticrist». Finiu leger igl «Anticrist» hai la notg vargada. Finir san ins buc el il di. Sia fin croda ella notg! Ella notg dil carstgaun. Ella notg cun sias umbrivas dad odi e malgiustia, da suffrir e pitir, d'anguoschas e malsegirtad, ella notg che fa trests e pensivs. La notg ch'ei denton malgrad siu buordi magari era grazia. Oz, il venderdis, il di ch'il Gest ha pitiu malgest, hai fatg visetas en perschun. Miu artechel ei forsa perquei empau curios. Mo bandunond ina perschun vegnas curios. La perschun plein garters da fier. Garters gross sco tretschas. Mintga corridor interruts treis, quater, tschun gadas cun portas da garter, da garter da fier, da garter sco tretschas. Il carstgaun stat davos. Il sulegl malegia il garter sin sia fatscha. Il carstgaun ei signaus. Mo il garter ei buca mo umbriva. Na, el exista, ei freids, ei ners, ei fermes, ei odi, ei pissiun, ei malgestadad, ei scuidonza, ei gretta, ei manzegna, ei sco s. Marc lai dir il malspirtau da Gerasa (Mc 5,9), 'legiun'. Trest che tons sesan en perschun. Forsa tuts? Segiramein biars!

Il «Fegl digl anticrist» ei vegnius oz cun mei en perschun. Ni, el seseva gia leu! Quei ch'el ha confidau a mi, ha fatg vegnir in mument pensivs, curios! Ha tschaffau! Tschaffau, perquei che las umbrivas dil garter da perschun ch'il sulegl dil mund fereva sin sia fatscha, eran las umbrivas dil garter dalla cella d'in auter. Sulegl che fiera umbrivas ei paradox! Quei schabegi denton aunc ualti savens aschia el mund!

Scurlau ord la mongia

«Il Fegl digl anticrist» seseva veramein en perschun. Quei ch'el relata, ei buca mo fantasia ni invenziun d'in sribent. La materia ei buca scurlada ord la mongia. Dapi in triep onns ei il sribent sgr. Ludovic Hendry s'occupaus da fatgs penals, da sentenzias e condemnaziuns, da proceduras penals e surtut dall'execuziun da castitgs. «Per tals motivs hai jeu visitau passa in miez tozzel perschuns e quei pliras gadas e per conclusiun staus entgin temps mez en ina cella sco il pli davos galiot. Aschia che jeu sun vegnius en contact culs perschuniers sez, cun survegladers, administraturs, directurs, psicologs, psichiaters, inquisiturs e schizun cul procuratur public. — Ils fatgs ch'jeu presentel ein talmein cruschai ch'els tangheschan in triep persunas e quei da rudien che negin ei stgis d'identificar ina suletta persuna. Mo ils fatgs ein deplorablamein vers e succedi, ton il fatg penal, sco tal, la procedura e l'execuziun.» Aschia il sribent sez.

Ils fatgs ch'ei vers

Tenor resumada el roman sez eis ei ils suandonts: Dil vitg enagiu vegnan els, ils umens da Crestasut culs scults ed in zugl nitschuns e la bara dil Fidel Oliva. Il president Malaval ei dil meini da satrar il defunct senza funcziuns ecclesiasticas davos il mir dil santeri. Pertgei? Perquei ch'el hagi ina veta ora fatg encunter la religiun e seigi in anticrist, il Fidel Oliva.

Dapi la midada da culissa ein ins vidlunder da scuvierer il misteri. Ins scutina ch'igl Oliva seigi senza fraud vegnius fatgs ord ils peis. Indezis dil delict? Eruir per propi sia fin ei buca lev.

Gion Paul, il fegl digl anticrist va egl jester. Suenter ina partida onns tuorna el sco giuven scolast e surpren la scola cumplensiva da Darval. Cun intenziun e buca senza malart vev ins fatg amogna agli

quella piazza, sperond fermamein ch'el vegni buca da surventscher las difficultads. Certa glied han registrau cun petradad il success. Gion Paul tila a dies igl odi dils mediochers ed ei periclitaus. Periclitaus oravontut dil Malaval ch'ei sin sefender ch'il fegl dalla vieua spel dutg ha tonta simpatia. Marieva la matta preferida da Gion Paul, mo destinada per il Giohen il fegl dil Malaval. Il cumbat vehement per la matta dil selvicultur entscheiva. Igl act final ei ina gronda tragedia.

Gion Paul ei naivs, mo vul bein. Vesa buc il mal. La glied ei nauscha, sco savens sil mund ed en nos vitgs, e vul mal. Gion Paul vegn afuns e vegn mess en fermonza. En perschun ha el caschun da far enconuschientscha cun l'execuziun dil castitg. El ei veglionts e nota ils eveniments el stabiliment penitenziar.

Entochen ch'el stat in di avon il tribunal. Las declaraziuns dallas perdetgas attrain l'attenziun dils derschaders.

Il perschunier tuorna a casa e trembla, trembla dalla sorpresa, dall'anguoscha, trembla vesend con lunsch la notg da miseria, dad odi, da pitir e suffrir ha catschau si'atgna mumma. Quei che teneva el, Gion Paul, numnaus savens en beffa il fegl digl anticrist, a Crestasut, ei buca pli. Crestasut privescha sesez tras odi scuidonza e gretta d'in bien spért. Gion Paul va puspei egl jester.

Per finir

«Igl anticrist» ha senz'auter gronda tensiun. Naven dall'emprema entochen alla davosa pagina. Sulettamein certs passus sillas paginas 50-51 e 126-127 paran a mi persunalmein empauet artificials, quei vul dir buca propi reals. Pigl guter ei il lungatg elegius e modellaus e cuntegn veramein in tschuat garnins e verdads. Quei ch'ei il stil digl autur semuossa puspei cheu. El dat peisa alla construcziun cuorta e preferescha il dialog. Quei ch'ei modern e corrispunda al gust da nies temps. - Il maletg dalla cuviarta - ch'ei denton buca da pli grond muntada per in cudisch - digl artist sgr. Karoly Somogyi fuss staus megliers pli moderns. Buca pervia dil modern, mobein perquei ch'ins savess presentar cul stil modern simbolic meglier il cuntegn dil cudisch. Detagls ein sin ina cuviarta buca necessaris.

Alla 'casa editura Desertina' nies compliment per la biala ediziun! A nies Ludovic Hendry nossa cordiala gratulaziun e bien engraziament per si'ovra bein reussida. Ed ei il «Discuors cugl assassin» - la proxima ovra - aschia scol «Fegl digl anticrist», lu spetgein cun malpazienzia e legria!

A nos Romontschs bia plascher e bia profit spirtal dil niev roman «Il Fegl digl anticrist» ch'ins sa retrer dalla Casa editura Desertina, Mustér.